

**Ilinniartitaanerup aaqqissuussaanera eqaatsoq ataqatigiittorlu qanoq
toqqamavilernissaanut apeqquteqaat aallaavigalugu oqallinnissamik siunnersuut**
(Inatsisartunut ilaasortaq Najaaraq Møller, Siumut)

Akissuteqaat

(Meeqyanut, Inuuusuttunut, Ilinniartitaanermut, Kultureqarnermut, Timersornermut
Ilageeqarnermullu Naalakkersuisoq)

Naalakkersuisut sinnerlugit Inatsisartunut ilaasortaq, Najaaraq Møller, Siumut,
qujassuteqarfiginiarpala maanna ilinniartitaanerup aaqqissuussaanera eqaatsoq ataqatigiittorlu
qanoq toqqamavilerneqarsinnaanerannut oqallinnissamut pingaaruteqartumut
periarfissiimmat.

Ilinniartitaaneq nammineernerulernissamut qitiuvoq, meeqqavut meeraanermiit
inersimasunngornermut ikaarsaarnerannut sapinngisamik tulluarsakkamik ilinniartitaanermut
aaqqissuusiorissarpalut pingaaruteqarluinnarpooq.

Nassuerutigissavarput, ukioq manna Ilinniartitaanermut pilersaarutip takutikkaa innuttaasunut
ilinniartitaanermut aaqqissuussamik eqaatsumik ataqatigiittumillu pilersitsissagutta
sulinutinik aallartisartariaqartugut. Tamatta innuttaasunut tamanut peqataatitsumik
ilinniartitaanermut aaqqissuussaqarnissarpalut soqutigisaraarput. Ilinniartitaanermut
aaqqissuussaq innuttaasunut tamanut, qanorluunniit tunuliaquteqarpata, suaassuseqarpata
atuagarsornikkullu pikkorissuseqarpataluunniit, assigimmik inuussutissarsiulernissamut
piginaanngorsaataasumik imaluunniit qaffasinnerusumik ilinniagaqalernissamut
periarfissiisaaq. Ilinniagaqalersinnaanermut aporfiusut peerniarsarissavagut, peqataatitsineq
nukittorsassavarput suaassuserlu pissutigalugu assigiiingissutsit nalimmarsarniassallugit -
suliffeqarfitsinni ilinniartitaanerullu iluani.

Pitsaanerpaamik angusaqarluarniarluni aaqqissukkamik ilisimasallu aallaavigalugit sulineq
pingaaruteqarpoq. Taamaammat Naalakkersuisut aaqqissukkamik ilisimasallu aallaavigalugit
sulinissaminnt ilungersorsimapput. Tamanna ilaatigut ilinniartitaanermut nutaamik
periusissiortoqneratigut pivoq, taannalu appaagu ukiup aallartilaarnerani
saqqummiunneqassalluni. Ilinniartitaanermut periusissiami meeqqat atuarfianni
atuartisinerup qaffassisusaa qanoq pitsanngorsarneqarsinnaanersoq ukkatarineqassaaq,
taamaaliornikkullu ilinniartitaanikkut pitsasumik ingerlariaqqinnissamut sinaakkusiussalluni.
Tamatuma saniatigut Naalakkersuisut nuna tamakkerlugu ilinniartitaanermut
siunnersuisoqatigiinnik sumulluunniit attuumassuteqannngitsunik pilersitsinissamik
sulissuteqarput. Siunnersuisoqatigiit ilinniartitaanermut politikkitta
kinaassusersiortuunngitsumik siunnersorneqarnermik immikkullu ilisimasaqarnermik
tunngaveqarnissai qulakkiissavaat. Siunnersuisoqatigiit ilinniartitaanermut tunngasunik
tigussaasunik siunnersuisoqatigiit naalakkersuinikkut tulleriaiarinerit aallaavigalugit
atingaasaliissutit sapinngisamik sunniuteqarluarnerpaaffimminiinnissaannut peqataassapput.
Ilinniartitaanermut aaqqissuussaq innuttaasunut tamanut naligimmik periarfissaqarnermik
qulakteerinnittooq anguniarparput.

Peqatigalugu Naalakkersuisut akuersaarutigaat, aaqqissuussaq ataqatigiittooq eqaatsorlu
atualinnginnermi aallaaveqartariaqartoq. Inuiqatigiinni nukarliit inuunerminni
aqquaagassaminnt piareersarnissaannut ataatsimoorluta tunngaviliissaagut.

Naalakkersuisut naqissuserusuppaat, ilinniarneq namminersornerulernissatsinnut qitiulluinnartoq. Naalakkersuisut ilinniarnermut aaqqissuussamik eqaatsumik ataqtigittumillu pilersitsinissaminut pisussaaajuarsinnarput, aaqqissuussarlu taanna meeqqavut suliffeqarfitsinni meeraanermiit inersimasunngornermut ikaarsaarnerminni sappinngisamik pitsaanerpaamik naleqqussagassaassaaq.

Oqallinnissamut pissanganartumut aammalu inuiaqatigiinnut iluaqutaasussamik ilinniartitaanermik aaqqissuussamik nukittorsaanissamut suleqatigiinnissamut qilanaarpunga.